



Progetu finantziau cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

Nostra Sennora d'Ìtria.

Una diri, de meda, in s'oru de su mari de Piscinas, tres o cuatru massajus fiant traballendi in cussas terras de acanta e iant biu una càscia annadendi in su mari. Credendi ddoi fessit dinai o cosa de balori, fuliada in su mari de calincunu piscadori, cun una scafa fiant arrennèscius a dda piscai.

Dd'aberint e agatant Nostra Sennora cun su pipiu Gesùs. Fiat sa virgini e fiat bènnia in sa bidda nosta po miràculu. Luegus iant bitiu sa noa a su sìndigu e su vicàriu e fiant torraus a bandai totus in paris a Piscinas: iant postu sa càscia cun Nostra Sennora in unu carru a bois e iant lassau andai su carru chentza de ghia anca boliat issu, aici iant pòtziu biri innui Nostra Sennora iat bòfiu a dda fraigai sa crèsia.

Apustis ca su carru fiat andau oras e oras si fiat firmau acanta de sa bidda sinnendi cun is arrodas su logu innui Nostra Sennora boliat ca fessit fraigada sa crèsia.

Iant fintzas proau a pungi is bois cun su strumbu po fai a manera chi sa santa arribessit a sa bidda, ma is bois no iant bòfiu andai prus a innantis e intzandus iant fraigau sa crèsia in cussu logu e in pagu tempus dd'ant acabada e de cussa diri afestant tNostra Sennora d'Ìtra dònna annu in sa matessi diri.

Meda tempus fait is terras acanta de su mari fiant bisastradas de is trucus, issus ndi furànt totu su chi teniant is massajus, e ndi pinnigànt fintzas is massajus e ddus bitiant in Truchia po fai is serbidoris.

Una diti totuinduna, in s'interis ca is massajus fiant traballendi sa terra prexaus, si funt bius cassaus e impresonaus de is Trucus. Fiant stètius pigaus e bitius in s'oru de su mari, sètzius in mesu de is scafas de issus, funt partius e non sind'est scìpiu prus nudda.

Nci boliant ses mesis a sa festa de Nostra Sennora d'Ìtria, e unu de cussus pòberus massajus, fatu serbidori de unu trucu, iat nau a su meri:

- Lunis in sa bidda mia faint una grandu festa;

Su meri non dd'iat arraspustu, e sa bigilia de sa festa candu su serbidori fiat spinniendi unu caboniscu po ddu coi, si chèsciat torra cun su meri e ddi narat:

- In bidda mia cras fanit una grandu festa;

E su meri dd'at arraspustu:

- Ddoi iast a bolli essi a beru?

E su sebidori at arraspustu:

- Ddu creu ca nc'ia a bolli essi;

E su meri:

- Càstia tui as a biri torra sa festa de sa bidda tua ca mi contas candu custu caboniscu, ca est coendi in sa pingiada, at a cantai torra;

Càstia su miràculu de Deus: su caboni movit is alas e nci brincat aforas de sa pingiada e incumentzat a cantai.

Su trucu spantau e arrannegau ita fait? A de noti nci stichit su serbidori in una càscia, ddu serrat e si-nci crocat apitzus. S'incras a mengianu iant biu in su mari de Piscinas una Càscia cun unu trucu crocau apitzus, aintru nci fiat su serbidori sanu e sarvu.

Ndi tirant sa càscia de s'àcua, faint bessiri su serbidori e ddu faint andai a domu sua aici iat pòtziu partetzipai a sa festa de Nostra Sennora d'Ìtria e issu iat bìviu àterus annus meda.